

2021-imí Inatsisartut ukiakkut ataatsimiinnerat ammarlugu oqalugiaat

Naalakkersuisut siulittaasuut, Múte Bourup Egede

Ataqqinartoq Inatsisartut Siulittaasuut, Ataqqinartut Inatsisartunut ilaasortat, minnerunngitsumillu nunatsinni innuttaaqatikka.

Aallarniutigalugu Inatsisartut Siulittaasuata tikilluaqqusilluni oqaassiinut qujanaq.

Takorlooruk aanaap aataallu ukiorpassuarni nunatsinni suleqataareersimallutik ernutannguartik tasiorlugu, qimallutik aneersuartut.

Inuunerminni aqquaagaqarsimaqalutik, asanninnermik piffissamillu pigisaminnik tamanik, ernuttaminnut inuunermini aallarteruuttortumiut tunniussaqartut.

Kinguaariit tullinut naleqartitaminnik, siuliminnit kingornussaminnik ingerlatitseqqiisut.

Inuuneq sulilluareersimallutik eqqissillutik atoraat. Ilaqutaasalu tulaavigilluaraat.

Asanninneq. Misilittagaq. Sulilluarsimaneq. Nunamut annertuumik tunniussaqarsimaneq, inuunerminni imartuumi aqquaareersimallugu. Sulilu ingerlateqqikkumallugu.

Tassa inuiattut qujaniarfissagut. Ullumi. Pereersut siunissarlu aamma ilanngullugit.

Nunatsinnimi pisuussutit pingaarnersaraat: Meerartavut. Utoqqartavut. Nunatsinni innuttaasut tamarluinnaasa.

Taakku atugarissaarpata, nunarput ingerlalluarnissaminut tunngavigissaarnerulissaaq.

Siunissamut, periarfissanik ulikkaartumut, ikaarsaalernitsinni tamanna avaqqussinnaanngilarput.

Siunissamut naliigiiffiunerusumut, naapertuilluarnerusumut mingutsitsiffiunnginnerusumullu. Piffissamut nutaamut, nunatta siunissaanut ingerlaarnissatsinni – inui puigussanngilavut, qitiutissavagut.

Ukioq kingulleq tamatta nalunngisatsitut nualluussuarmik Nunarsuaq tamakkerlugu siaruaattumik eqqugaavugut.

Nualluussuup COVID-19-ip inuuneq nalunngisaraluarpot allangortilluinnarpaa. Inuiaqtigittut ingerlaasitsinnut allannguigaluartoq ataatsimoorluta iliuuseqqaqatigiinnitta takutippaa nualluussuup kingunerluutissaralui annertuut pinngitsoorneqarsinnaasimasut.

Tassani ataatsimoorneq qitiulluinnarsimavog, maannamullu suli qitiulluinnarluni.

Innuttaasut akisussaaffimmik annertuumik tiguseqataasimapput, mianersornikkut minnerunngitsumillu annertusiartuinnartumik akiuussusertinnissamut akuersarnermikkut.

Aallaqqaataaniilli partiit siuttui nuaalluussuarmut akiuinarluni iliuuserineqartunut pisariaqarluinnartunullu tunuliaqutaajuarsimapput, sulilu tunuliaqutaallutik. Taamatut naapeqatigiissinnaaneq ataatsimoorlunilu siunnerfeqaqatigiinnerup qanoq nukittutiginera ersarilluinnarpoq. Pisariaqarpormi.

Naalakkersuisuniit siunniupparput ataatsimoorneq, naaperiaasinnaaneq aammalu aaqqiissutissanik ujartueqatigiinneq sulinitssini qitiussasoq.

Naalakkersuisooqatigiinnermut isumaqatigissutitta qiterivaa, innuttaasut nunatta siunissaanut peqataalluarsinnaanissaat. Tassanilu qitilluinnarpoq uagut qinikkatut ataatsimoorluta siunnerfeqaqatigiittarnitsigut, innuttaasut peqatigalugit naligiinnerusumik toqqisisimanartumillu ineriartortitsisinnaanissarput.

Nunatsinni sulismalluni utoqqalinerup nuannersuunissaa kissaatigaara, qularinngilaralu aamma tamassi taama isumaqartusi. Aanaami aataalu sulilluareersimasut, inuiaqatigiittut qujaniarfissaraavut.

Ivertinneqarnitsinnit aningaasanut inatsisissamut siunnersuut suliarisimavarput, aningaasamut inatsisissami Naalakkersuisut utoqqaat pillugit suliniutissatut ukiup tullissaanut aningaasat 15 mio. koruunit ukiullu missingersuuisorfiusut tulliinut, aningaasat 30 mio. koruunit immikkoortitassatut siunnersuutigaarput. Neriulluaatigalugu aamma kissaatigalugu Inatsisartuni partiit siammasissumik utoqqartavut pillugit isumaqatigiissuteqarsinnaassasut. Aningaasammi qulaani pineqartut aanaap aataallu kaasarfimmioqarnerulerlutik atugarissaarnerulersinnaanerannut periarfissiippuit.

Utoqqartatta atugarisaasa pitsangorsarnissaat ataatsimoorluta peqatigillatalu suliariissagipput qularutigingnilara. Naalakkersuisuniillu siammasissumik paaseqatigiiffiusumillu oqaloqatigiinnissatsinnut qilanaarpugut.

Naalakkersuisuni tassungaannaq unikkusunngilagut. Nalaakersuisuniit pingaartipparput utoqqartatta atugaat ukiuni aggersuni politikkikkut ukkatarineqassasut.

Utoqqaat atugaat pitsaanerulersikkumallugit akissaataasa qaffannissaanik siunertaqarneq uniffigiinnarnagu, periusissiorneq aallarteruttorpoq.

Utoqqaallu illersuisuata namminiussuseqarnerulluni sulinissaanut aningaasaleeqqinnissamut aamma siunnersuuteqarluta.

Suliassavut pisariaqartut nunatsinni naligiinnerusumik inuunissamut, naapertuilluarnerusumillu atugaqarnissamut, oqartussaaqataanerup innuttaasunit malugineqarnerunissaanut, inuussutissarsiutitigut ineriartornissamut siuariartornissamutaaq tungassuteqarput.

Naalakkersuisut aaqqiissusseqqinnerit inuit atugaanut nukittorsaataasussat qiningaaffimmi matumani aallartissavaat.

Pingaartipparput innuttaasut, innuttaasut sinnisaat Inatsisartuni minnerunngitsumillu kommuunit peqatigalugit suleqatigiinnissatsinni paaseqatigiiffiusumik amerlanerpaallu ataatsimoorfigisinjaasaannik aallaavilimmik suliassat allannguinerillu annertuut aallartinneqartarnissaat.

Naalakkersuisuni tamanna Inatsisartut Inatsisissaattut siunnersummi aallarnisalaalerpagut ukiunilu tulliuttuni tamanna annertunerusumik sammineqartalissalluni.

Suleqatigiinnitsinni qitiulluinnassaaq meeqqat inuuusuttulu ilinniarnissaat. Ilinniarneq nunatta siunissami ineriartornissaanut qitiulluinnarpooq tassanilu ammasumik eqqartorlugulu suleqatigiissutigisariaqarparput qanoq ililluta amerlanerusut ilinnialernissaannut aqqutissiuussisinnaanerluta.

Tassani Inatsisartut, kommuunit susassaqartullu allat suleqatigeqqissaarnissaannut Naalakkersuisuniit qilanaarpugut. Aamma takorloorparput oqaloqatigiissutissatsialasoq, ilinniartitaanerup nunatsinni inuussutissarsiornikkut tunngavigisavut inerisarumasavullu aallaavigalugit ineriartorteqqinnissaat. Tamatta siuariartuutissatsinnik.

Aningaasanut inatsimmi tassaavoq nunatta ulluinnarni siunissamilu ingerlanneqarneranut siunnerfiliisoq tassaavortaaq meeqqatta, angajoqqaaqatitta, aanaakkut aataakkullu inuunerannut sunniutilik.

Meeqqat - Kommuuninik suleqateqarneq

Meeqqat atugaannut tunngasut tikitsinnagut pissusissamisoorpoq ilisimatissutigissallugu Inatsisartut Siulittaasoqarfiannut Meeqqanut, Inuuusuttunut Ilaqtariinnullu Naalakkersuisussamik akuersinissaq ataatsimiinissatta tulliani oqaluuserisassanngortinnissaa ullumikkut qinnutigigakku.

Meerartagut nunatsinni aanaakkunnit aataakkunnillu pakkutaarneqarlutik nukinnik ilisimasanillu tuniorarneqarsinnaajuartariaqarput.

Peroriartorneq toqqisisimasoq inuaqatigiinnik peqqissunik pilersitsisuuvvoq. Taamaattumik meerartatta toqqisisimasumik peroriartorsinnaanissaat, inuaqatigiittut ataatsimoorullugu suliarisariaqarparput.

Pisortaniit annertuumik akisussaaffeqluta ilisimalluinnarpalput taamaattumillu meerartatta illorsoneqarsinnaanerat suleqatigiinnikkut ineriartortittuaannarnissaa Naalakkersuisuniit siunertaraarput. Akisussaaffillu aamma tamatsinniinera puigussanngilarput.

Nunatsinni innuttaasut inatsisitigut illersugaaneri nukittorsartuarnissaat Naalakkersuisut pingaartippaat, nalunngilaralu Inatsisartunit tamanna aamma pingaartinneqaqisoq.

Iliuuseqarnikkut timitalisarnissarput sulinermi pingaartipparput, inuaqatigiinni killissamik qaangiisarneq akiorniarlugu sulisariaqarpugut. Kinguaassiutitigummi kanngutsaattuliorfigitissimasut eqqarsaatigalugit, pineqaatissiisinnaanermi taassaapput uagut, maannakkorpiaq inooqataasut.

Killissamik qaangiisarneq nalinginnaasunngorsarneqanngisaannassaaq, ersarittumik akiorniaraanni oqaatsit iliuutsillu ataqtigiittariaqarput.

Ilaatigut suliniutit nukittorsarneqarnissaannut atatillugu ukiaq manna saqqummiussinissatsinni inuppassuit meerarpassuillu, inuup kialuunniit kissaatigingisaannagaanik killissamik qaangiiffigitillutik kinguaassiutitigut kanngutsaattuliorfigitissimasut eqqarsaatigalugit, pineqaatissiisinnaanermi sukaterisoqarnissaannut siunnersummik saqqummiussissaagut. Taamatut saqqummiussineq ukiuni arlaqalersuni Inatsisartuniit kissaataasimanera malillugu aalajangiiffigineqarsinnaanngorluni saqqummiunneqassaaq.

Inoqarpoq killissamik qaangiiffigitissimanertik suli oqaasinngortissimannngikkaat, ilaasalu avammut oqaatigneratigut sapiissuseqalersitsillutik kinguaassiutitigut atornerluisarneqrup, inuaqatigiittut ajornartorsiutaanerata inuaqatigiinni aaqqitassatut ukkatarineqarnissaa pillugu sorsuuteqarput.

Naalakkersuisuniit inuit sianerlutik oqaloqateqarsinnaanerat annertusarparput taamaaliornikkut inuit ikiorneqarnissaminntu taperserneqarnissaminnullu periarfissaat annertusarlugit. Iliuuserineqartariaqartut tassunga uniinnassanngillat. Ataatsimoorussamillu iliuuseqarnissarput tamatta pisussaaffigaarput.

Nunaqqatinnut killissamik qaangiiffigitissimasunut oqarusuppunga; kisimiinngilatit, inoqateqarputit asaneqarputillu, aamma inuttut minguissuseqarputit, maannakkorpiaq artornartorsioruit – ikiortissarsiorit.

Inuiattut unammilligassarput alla aamma tassaavoq imminut toquttarneq. Inuuusuttunnguit inoqativullumi taamak annasimallugit tusaraangatsigit, tamatta aliatsanngitsoorneq ajorpugut. Eqqugaasarlatalu. Unammilligassatta ilaai eqqaavakka pisariaqarmat. Nunatta pisuussutai pingaernerit tassaammata inui. Unammilligassattalu qaangernissaannut, sorlai tikillugit sulisariaqaratta. Ajornaatsuinnaanngilaq ataatsimooruttali qaangiiniarluarnissamut nukissaqalissaagut. Ikioqatigiitta innuttaasut pisariaqartippaat tamanna.

Ukiaq manna qaammatip uuma qiteqqunnerani Naalakkersuisut borgmesterillu naapippugut. Borgmesterit Naalakkersuisullu politikkikkut allorassaqatigiinnissaat ataatsimiinnermi siunertaalluni.

Innuttaasut kommunini sinnisaasa naapissimanerinut qujarusuppunga, kommunenillu iluani atorfedqartunut tamanut oqarusuppunga: sulinersi nunatsinnut pingaaruteqaqaaq, ilissi innuttaasut qanimut sullipassi, pisariaqartinneqarpu, kivitseqataanersi nukissamik tunisisuovoq sulinissinnilu tamanna eqqaamajuarsuttoq.

Naalakkersuinikkut nuna tamakkerlugu siunnerfeqarnerni tamani, kommuunit peqatiginissaat taakkualu ilisimasaminnik ingerlatitseqqittarnissaat pisariaqarpoq.

Kommuunit tallimaasut ataatsimoorussaminnik, inunnik isumaginninnermut sulineq aammalu meeqqat angerlarsimaffiup avaataanut inissinneqartarnerat pillugu Naalakkersuisunut saaffiginnissuteqarput.

Saaffiginnissutaat pimoorussamik tiguarput, iliuuserisinnaasarpullu alloriaataaqatasinnaasoq tassaavoq, isumaginninnermut suliaqarfiup iluani annertunerujussuarmik suleqatigiinnissaq.

Piviusunngortitsiniarnitsinni isumaginninnermut suliat siuarsarnissaat siunertaralugu, kommuunit qaninnerusumik suleqateqarunnerput borgmesterinut apuussimallugu.

Taamaaliorpugut Naalakkersuisut kommuninik suleqateqarnerput nukittuujutikkumagatsigu, pingaaruteqarluinnartutummi isigaagut innuttaasunik qanimut sullissisut.

Allatut oqaatigalugu Naalakkersuisut kommuunillu imminnut pisariaqartipput. Illuinnaanik siuariartortoqarsinnaangilaq, tapertariilluta iliuuseqarnikkut innuttaasut kiffartuussagut iluaqutsersinnaavagut.

Aningaasanut Inatsit sularisarput siulleq, inuit pisinnaatitaaffiinnik ilisimaqarfiiit suliaqarfiillu aningaasaliiffiqineqarnerussasut siunnerfigaarput.

Pingaaruteqarmat pisinnaatitaaffiit inuiaqatigiinni eqqummaariffiqineqarnerisigut, naalakkersuinikkut suliaasut pitsaassuseqartumik aaqqiissutissaqarluartunillu tunngaveqarnissaat.

Naalakkersuisunit pisinnaatitaaffiit pillugit ilisimasat paasisimasallu nalituutut inuiaqatigiinnilu namminiileriartortuni pisariaqarluinnartutut isigaagut.

Pisinnatitaaffimmi eqqartorneqarnerisigut iliuuseqarfingineqarnerisigullu aamma inuttut inuiattullu pisussaaffeqarnerput ersersinneqartarmata.

Angallanneq takornariaqarnerlu

Qineqquaarnermi partiit tamattaalluta neriorsoqatigiippugut qinigaaffiup siuliani aporaassimanerujussuarput illikartillugu, nunatta maanna pisariaqartitaa, tassa naalakkersuinikkut akisussaaqatigiittumik suleriuseqarnermik ingerlatsissalluta.

Tamanna pisussaaffiliivoq. Naalakkersuisullu Siulittaasuattut partiit nersorusuppakka ulloq manna tikillugu oqaloqatigiissinnaassuseqaratta naaperiaasinjaassuseqarlatalu, naak isumaqatigiinngissuteqartalarualluta. Upperaarami oqaloqatigiinnikkut alloriaqatigiissinnaasugut, kiffartuutagummi tassaapput inuaat kalaallit.

Taakkulu kiffartuulluarumallugit nunatsinni mittarfiliornerit, Inatsisartut 2018-imi aaliangigaat pillugit, Naalakkersuisut ammasumik ingerlatsinissaq toqqarsimavaat.

Inatsisartut tunngavissagissaarnissaat oqallinnermi ingerlariaqqinnermilu periarfissaalluartikkumallugu. Aningaasarsiornikkulli unammilligassat aamma suliani taakkunaneersut nalunatigit, siunissamut sulinissarput tunngavissagissaartikkumallugu.

Taamaammallu piviusorsiortumik akisussaassuseqartumillu, mittarfiit pillugit aaliangerneqarsimasut naammassiartortinnejarnissaat suliassaraarput.

2018-imi mittarfiit sanaartornissaanut sinaakkutissat, Inatsisartut akueraat maannalu paasinarsivoq naatsorsutigineqarsimasut missingersuutaasullu ullumikkut allaasut. Tamanna pillugu inuaqatigiittut - inuit ulluinnarni atugaannut ajorseriartitsiffiuallaanngitsumik aaqqiinissaq Naalakkersuisunit kissaatigaarput.

Mittarfiit angallannikkut takornariaqarnikkullu atorneqarnissaasa saniatigut, nunatta iluani angallannikkut siuarsaanissarput pisariaqarpoq.

Angallannikkut attaveqaatitigullu pissutsit, annertuumik inoqarfinnut sunniuteqartarpot, minnerunngitsumillu inuussutissarsiutitigut siuariartornissamut aalajangiisuusarlutik.

Takornariaqarneq nunatsinni inerisaqqilluassagutsigu, pingartumillu Covid-19-ip inooqatigiartuinnarnera ullullu nalinginnaasut uteqqikkiartortillugit. Taava takornariaqarnermi mittarfissuit sanaartorneqartut kisiisa isumallutigisinnaanngilavut.

Tunngavisseeqataalluassapput taamaattorli tikittusanut nunallu tamarmiusup aningaasarsiornikkut iluaquqarnissaanik qulakkeerinissagutta. Avaqqussinnaanngilarput nunap immikkoortuisa periarfissaanik inerisaanissarput. Takornariaqarneq aningaasarsiornermut pitsaanerpaamik tunngavisseeqataaqqullugu.

Sumiiffinni siuariartitsisisinnaavugut

Ullaakkut makilluni sulineq, pisinnaasatigullu imminut inuaqatigiinnullu tunniussaqrneq nukiuvog angisooq.

Nukiit innuttaasut pigisaat tassaapput sumiiffisami pikialaartitsisuusut. Sumi tamani, inuiaqatigijit akornanni suleqataasutut misigisimaneq tassaavoq meeqqatta isigisassaat, meeqqatta nuannaortorisassaat. Maligassiusussavaugummi kinguaatsinnut.

Qitiusumit kommuunini qanoq ineriertortoqarnissaanik aalajangersaanerit, qanoq iluaqtaatigineri nalilertariaqarpagut. Qitiusumimmi aalajangersaanerit kingunerisarpaat, innuttaasut ineriertornermut peqataasutut misigisimajunnaarnerat, taamaanneratalu pitsaanngequai naalakkersuinikkut sapiissusilimmik alloriarfisinaasariaqarpagut.

Naalakkersuisut nunatsinni sanaartornikkut inuussutissarsiutitigullu qitiusumit aningaasaliisarnerit siunissami kommuuninut akisussaaffigitikkiartuaartinneqarnissaannik siunertaraarput. Assavullu isaappavut, suleqatigiissutissaqqissutummi isigigatsigu.

Inuussutissarsiutit aningaasaqarnerlu tapertariippuit, nunattalu nutaajusumik aningaasarsiornikkut isaatitsilernissaa pisariaqarpoq.

Inuussutissarsiutit pillugit oqallittarnerni, nunatsinnut aningaasanik isaatitsiartortussat avataaneersut eqqartorneqakkajupput, aamma pisariaqarpoq imminerminilu isuma tamanna akornutissartaqanngilaq tikilluaqqusassaallunilu.

Soqtiginartuali uaniipppoq, uagut innuttaaqataasut piginnaasagut inuiattullu nammineq ineriertissinnaasagut nunatsinnullu isaatitsissutaalersinnaasut sammissallugit.

Innuttaasut nammineq ineriertitsinermikkut ineriertornermut piginneqataanissaat pisariaqarpoq, nammineq iliuuseqarnikkut ineriertitsinikkullu inuiaqatigiinni piginnaasaq ilisimasarlu piulersarpoq, tamannalu iluatsissinnaagippit upperaara.

Aningaasarsiorfissanik pilersitsiniarnermi isumalluutitta pitsaanersaraat nunap inui, inuit ineriertornermut peqataatinneqarnermikkut kivitsissaqqaarput.

Tamattami illoqarfisatsinni nunaqarfisatsinnilu suna ineriertortitassaasoq ilisimavarput.

Ukiup tullianinngaanniit nuna tamakkerlugu, nunap immikkoortuini inuussutissarsiutitigut siuariartornissaq siunertaralugu, ataatsimoorussamik Nunaqarfinni Aqutsisut, kommunalbestyrelset, Inatsisartut sumiiffinnilu inuussutissarsiornikkut susassaqartut peqatigalugit siunnerfinnik suliaqarnissaq aallartisassavarput.

Soorluttaaq inoqarfiit inukinnerusut ataatsimeersuarnissaannik aaqqissuussinissarput, aningasanut inatsisissami siunnersuutigippit.

Nunatsinni nunaqarfippassuaqarlunilu illoqarfeqarpoq, nunatta sinneranut siuariartitsisunik, aammalu nunaqarfeqarpoq illoqarfeqararlunilu periarfissaqarfiusunik atorluarneqanngitsunik. Imminut pilersornerulernissatsinnut aamma iluaqtaasinnaasunik.

Nunaqarfiit illoqarfiiillu, nunatta siuariartneranut iluaqutigisavut ineriertooqqinnissamut oqalliseqataanissaat iliuuseqaqataanissaallu naalakkersuisunit kissaatigaarput, siuariartornissamullu suleqatigiinnissarput qilanaaralugu.

Nunatsinni ataqatigiissaakkamik oqimaaqatigiissumillu siuariartornissarput Naalakkersuisunit suliarissallugu pingaartippalput, maani inersuarmi paaseqatigiissutaasumik inuussutissarsiutinut siuarsaneq pillugu siunnerfeqarnikkut, nunatta nalorninaatsumik patajaatsumillu inissinnissaa angusinnaavarput.

Siunnerfiit isumaqatigiiffisavut salliutsigit, sammisallu isumaqatigiinngissutigisagut taamaanneri akueralugit qitiutippallaarnagillu - nunarput pillugu siunnerfinnik isumaqatigiissutigisatsinnik, inuaat pillugit suleqatigiitta. Naaperiaasinjaassuseqarnikkut aatsaat siuariartortitsisinjaavugut.

Nunarsuarmi nunani minguinersaassaagut

Imermik minguitsumik imersinjaalluta, nunarujussuaq avatangiisimigullu assissaqanngitsumik kusanaqisoq inuuffigaarput.

Nunaqqateqarluta ulluinnarni saneqqullutik ilassiortunik, meerartaqarluta alapernaatsunik, immitsinnullu tapersersoqatigiissinjaalluta, nunatsinni asasatsinni najugaqarpugut.

Nunatta imminermini minguissuseqarnera kultooritsinnillu kingornutatsinik minguitsumik atorluaanermillu siulitta perorsagaanerat kingulitsinnut ingerlateqqitassatut nalitunerpaat ilaattut isigisarpara.

Minguitsumik nunatsinni atueriaaseqarnikkut nunarsuarmi nunat minguinersaattut inissinnissamut anguniagassinniarta, minguinnerusumik atueriaaseqarneq nunarsuatsinni naalakkersuisunikkut pingartinneqarpoq, uagut nunarsuatsinni akisussaaqataanerput takutitsigu.

Periarfissanik ulikkaarpugut. Mingutsinsinngitsumik ineriartorneq nunarsuarmi siuttuuffiginiartigu. Aningaasarsiornikkut atugarissaarnikkullu iluaqtissatsinnuttaaq.

Sumiiffitsinni meerartavut nunamik atueriaatsimik atorluaanermillu ilinniartitsigit, nunaqqatigiulluta tamaangaannaq eqqaqinata, eqqakkallu nunamiiginnartut isiginarnagit katerseqatigiitta. Aammattaarlu nunatsinni plastikkimik atuinitta eqqummaariffigineratigut annikillaasa.

Nunaqqatit iliuutsit annikikkaluartut, amerlasuut iliuuserilerpatikkit nukerujussuaq pilersissavarput. Taama isumaqarpunga, nunatsinni inuussutissarsiutitta pingarnersaat aalisarneq, avatangiisitsinneermat.

Inuussutissarsiullu uagut inuiattut pikkoriffisarput tullusimaarutigisarpullu atatittuassagutsigu sutigut tamatigut atueriaaserput eqqumaffigiuartariaqarpalput. Nunatta imartaani uuliasiorsinnaanissamut neqeroorttsisisarnerit Naalakkersuisuniit taamaatitsinissaq aalajangiunneqarpoq. Aperisoqarsinnaavoq uuliasiornerup taartissai suuppat? Uuliasiunginnikkut aalisagaatitta navianartorsiorsinnaanerat ingalassimatissavagut, nerisaqatigiillu illorsorlugit. Naalakkersuinikkut minguinnerusumik atueriaaseqarnissami siunnerfeqarpugut. Minguinnerusumik atuilluni siuariartortsinissaq nunatta iluanaaruteqarfifilluarnissaanik sulinissaq Naalakkersuisuniit siunnerfigaarput.

Naalakkersuisut matumani ataatsimiinnermi erngup nukinganik innaallagissiorfeqarnerit annertunerulersinniarlugit siunnersuuteqarpugut. Qasigiannguani Aasiannilu erngup nukinganik innaallagissiorfeqalernikkut sumiiffimmi inuussutissarsiutitigut minguinnerusumik atuilluni siuariartortsinissaq taamaassillu periarfissinnejassaaq.

Siunnersuummi aamma Utoqqarmiut Kangerluarsuanni erngup nukinganik nukissiorfiup annertusarnissaa siunnersuutigaarput. Taamaaliornikkut ataavaartumik minguitsinngitsumillu nukissiuteqannarsinnaaneq qulakkeerneqassaaq minnerunngitsumillu nukissiutit atorlugit inerisaanissamik periarfissanik ammaassisooqassalluni.

Erngup nukinganik nukissiuteqarneq naalakkersuisinKKut siammasissumik tapersorsorneqarpooq, anguniakkagullu qaffaamillugit minguinnerusumik atueriaaseqarnerup annertusarnissaannut inuiaqatikka peqatiseraassi.

Uuliasiornermut taarsiullugu erngup nukingata nukissiuteqarnikkut inerisaanermut Naalakkersuisuniit siunniupparput.

Ukiuni kingullerni Nunarsuami ineriartornerup takutippaa, nukissiutit minnguitsut atorlugit uuliap taarserneqarsinnaaneranut periarfissat annertusigaluttuinnartut. Nunammi aamma pissaanilissuit ilanngullutik nukissiutinik ataavartunik ujartuipput.

Taamaattumik minguinnerunissamik nukissiuutillu ataavarnerusunik atuinissamut pilersaarusrorpugut. Nunatsinni nukissiutinit mingutsitsinngitsumik tunisassiuernissaq, Power to X-imik taaneqartartoq naalakkersuinikkut ukkatarissavarput.

Nunatsinni pinngortitap nukii atorlugit nunatta aningaasatigut isaatitaqarlernissaa siunertaralugu naalakkersuisut maanna suliaqarput, ukiorulu Naalakkersuisut COP26-imut peqataanissaat pilersaarutigaarput, taamaasilluni nunatta soqutigisai suliassalu inuiappassuit nunarpassuillu nittarsaaneqarsinnaassammata.

Naalakkersuisut siunertaraat Inatsisartut qanimut suleqatigalugit, nunatsinni pinngortitap nukii mingutsitsinngittut atorlugit aningaasarsiorntta ineriartornissaa tunngavississallugu.

Tassa asu, periarfissat atorluarlugit nunarsuarmi siuttuuffigilernissaat sulissutiginiartigu. Nunarsuarmioqatitta ujartugaat. Nukik minguitsoq maani pigaarput naassaanngiusattumik.

Aalisarneq pikkoriffigaarput

Nunatsinni aalisarneq pikkoriffigaarput.

Nunatta pisuussutaanik tamatta pigisatsinnik, nunatta iluanaaruteqartarnera inuiattut aaqqissuussaanitsinnut tunngaviuvoq.

Aaqqissuussaanitta sanna, tassalu inuit peqqinnissaqarfimmit kiffartuunneqarnissaannut, inuit ikorfartorneqarnissaannik periarfissaqartitsinerput, akileraartarnerput, ilinniartitaanerput kaaviiartitaqarnitsinnik tunngaveqarpoq.

Taamaammallu nunatsinni aningaasarsiorfiit pikkoriffisagut siuariartortinnissaanut anguniagaqartariaqarpugut. Aalisarneq pikkoriffipput suli iluanaaruteqarfifilluassagutsigu nunatsinni aningaasatigut aalisarnikkut isaatitsinerunissaq peqatigiilluta ukkattarisariaqarparput.

Naalakkersuisut ilinniakkat aalisarnerup iluani ilinniarneqarsinnaasut nunatsinni pilersinneqarnissaat pillugu oqaloqatigiinneq aallartisarusuppaat.

Ippasaq aalisarneq pillugu ataatsimiitsitaliarsuaq isumaliutissiisumminik saqqummiussivoq, saqqummiinermi inuiaqatigiit oqallinnissaanut tunngavissamik periarfissaqalersitsivoq. Aalisarneq pillugu oqallinnissaq aggersoq Naalakkersuisut qilanaaraat, pisariaqavippermri aalisarnikkut inuussutissarsiuteqarnitsinni qanoq pisuussutitta ataatsimoorussatta nunatsinnut inuiaqatigiinnullu iluaquutaninngortissinnaanera pillugu oqallinnissarput minnerunngitsumillu iliuuseqarnissarput.

Naalakkersuisut aalisarnermut inatsisisamik saqqummiinissaat pissaaq inuiaqtigiinni susassaqartullu akornganni oqallilluartoqareerpat.

Tamannalu naatsorsuitigaarpot ukiup tulliani ukiakkut Inatsisartut ataatsimiinneranni piumaartoq. Qularnarpoq kikkut tamarmik iluarisaannik aalajangiisinnajumaarnissarput, taamaattorli akuutitsinikkut tamatta aalajangernermut toqqammaviit aammalu tunngavilersuutaasunut sunniuteqarsinnaanissarput ingerlanneqassaaq taamaaliornikkut siunertarineqartut aallaavagineqartullu tamatta ilisimassagatsigit.

Nunatsinni inuussutissarsiut pingaardeq, siunissamut nalorninaatsumik qulakkeerinniffigissallugu ataatsimoorfigisariaqarparput.

Aatsitassarsiorneq

Pisuussutigut uumaatsut nunatsinni siuariartortitseqataasinnaapput. Naalakkersuisut aatsitassarsiornerup inuussutissarsiutaanissa siunniussimavaat, aatsitassarsiornerillu suugaluartulluuniit mingutsitsisarneri eqqarsaatigalugit, mingutsitsinerit minnerpaaffianiiinnissaat inuiattullu aatsitassarsiornikkut ataatsimoorfigisinnaasatta aallunneqarnissaat kissaatigaat.

Sumiluunniimi puinnarluta imersinnaajuartariaqarpugut. Nuniassinnaasariaqarpugut. Aamma avalaannarluta aalisarsinnaasariaqarpugut. Siulittami nuna manna taamak uatsinnut kingornutassiaraat, kingulitsinnut taamatut aamma kingornunneqarnissaat siunertaralugu.

Inuaat sinniussaminnik qinersineranni uranisiortoqannginnissaanik isumaqartut innuttaasut siuttussamittut toqqarpaat, tamannattaarlu pillugu nunatsinni uran-imik aatsitassarsiortoqannginnissaanik inatsimmik naalakkersuisut ukiaq manna siunnersuuteqarpugut.

Aatsitassarsiorerit qinngorernik ulorianartunik uranitalinnik akoqanngitsut aallunneqarnissaat kissaatigaarput. Aatsitassarsiorfiit piiaanissamut pisinnaatitsissuteqartut, rubinisiorfik, Qaqortorsuarmi aatsitassarsorfik, kujataani kultisiorfik, Moriusani iliminitsimik atortussiaqarniarluni suliniuteqarnerit saffiugassanillu qaqtigoortunik suliniutit illersorneqarsinnaasut ingerlanneqarput. Suliniutillu taamaattut ammaffigineqarlutik.

Nalakkersuisuniit erseqqissaatigissavarput avatangiisirut akisussaassusilimmik Nunatsinni aatsitassarsiorneq tapersorsoratsigu inerisaaqataaffigissallugulu.

Naalakkersuisut ukiuni aggersuni aatsitassanut inatsisitta nutarsarnejarnissaa suliariniarpaat. Maanna inatsit pigisarput siammasisorujussuuvoq, tassa aatsitassarsiornermiit angisoorujussuarmiit inuup ataatsip annikitsumik ataatsitassarsiorsinnaaneranut tunngasumik inatsit imaqluni. Ukiup tulliani aatsissarsiornermut angisuunut taavalu annikitsumik aatsitassarsiornermut tunngasut immikkoortinneqarlutik inatsisiliuunneqassapput.

Aatsitassarsiornermut angisuunut innuttaasut pilersaaruteqaqqaarnermiit akuutinnejarnissaat sumiiffinnilu pineqartuni pissarsiaqaatit amerlanerunissaat qulakkeerneqarnissaanik siunertaqartumik inatsisisaaq suliarineqassaaq.

Namminersornikkut suliniutivut

Namminersorneq pillugu Inatsit suliniutitsinni tunngavigaarpot. Namminersornerlu pillugu Inatsit nunatta namminiilernissaanut periarfissiivoq.

Nunatta akisussaaffit suli pilersissimanngisai pillugit suliniuteqarnermi inuussutissalerinermut oqartussaaffiup nunatsinniilernissaanut suliaq Naalakkersuisut siunnerfigaat.

Sapaatip akunnerata tullata naalernerani danskit ministeriunerat naapeqqissavara, naapinneranilu siullermik inuussutissalerinermut oqartussaaffiup suleqatigiissutiginissaanik oqaluuserisassanngortitsisimallunga.

Naapinnermi upernaaq suleqatigiinnerup aammalu nunatta annerusumik illersornissakkut, sullimaniarnermut nunanullu allanut tunngassutilinnut -uagutsinnut tunngasuni toqqaannartumik akuutinnejarlunilu oqartussaaqataanerata annertusarneqarneranut sinaakkutissaq sammisavarputtaaq. Taamaalilluni nunatsinnut attuumassuteqartunut akuutinnejarlernissarpot toqqammavilerneqassalluni.

Maligassiueq takutitsilluarnerlu ataatsimoortitsisarput

Ukiaq manna Amerikap nunavittaani nunarsuarmi assammik arsarluni pissartangorniunnisamut nunatsinni arnat assammik arsartartut inuiattut tullusimaartillatalu ataatsimoortippaatigut. Misigisaq nuanneq, pissatsinnarlunilu.

Unammiat nunarsuarmi pissartangorniuunnernut anngutinngitsuulaaraluarlutik, inuiattut nukimmik tunivaatigut.

Takutippaat maligassiueq, ataatsimoornikkut kivitseqatigiittoqarsinnaasoq.

Takutippaat pikkoriffitik atorlugit, nunarput angusaqartissinnaallugu.

Taamatuttaarlu meerartatsinnut takutippaat, qanoq inuit anguniagaqatigiit akornanni ineriartortoqarsinnaasoq.

Manna iluatsillugu nunatsinni timersortartut, nipilersortartut, qilaetersortartut, erinarsoqatigiit, eqqumiitsuliortut, atuakkiorput, Nakuusaaqqat, atuarfimmi siulersuisuusut, assigiinngitsunik siunertaqrarlutik kajumissutiminnik sulillutik peqatigiifilerisut tamaasa qutsavigerusuppakka.

Illissi tassaavusi pisuussutit nunatsinni nalituut, aamma nunaqqatissinnik sulinersi takuneqarsinnaasoq, meerartavut maligassippasi inuaqatigiinnutaaq takutillugu, piginnaasasi atorlugit siunniuteqaaqatoqarsinnaallunilu tunniussaqartoqarsinnaasoq.

Taamatuttaaq qiningaaffiup siuliani qinikkatut sulisimasut aammalu Naalakkersuisuusarsimasut tamaasa qutsavigiumavakka, inuimmi kikkuugaluartulluunniit nunaminni sapinngisartik tamaat atorlugu, nunatta siuariartornissaanut sulisut nersugassaapput.

Inuaqatigiinnilu immitsinnut nersualaartarnerput takutittuartariaqarparput, meerartatta nalussanngilaat inersimasut oqaloqatigiissinnaallutillu suleqatigiissinnaasut. Maligassiusussaavugummi – siulitta tunniussaat kinguaassatsinnut pitsaanerpaamik ingerlateqqissallugu.

Takorloorummi aanaap aataallu ernutartik isumassoraat. Ilaqtariillu tulaavigilluaraat.

Aamma taamak ippugut inuaat kalaallit.

Immitsinnut isumassorluarutta. Tulaavigilluarsinnaagutta.

Siunissarput pilersilluassavarput. Avissaartuuffigut qitiutikkunnaarlugit.

Ikioqatigiikkaangatta – Ataatsimooraangatta – sunaluunniit angusinnaalersarparput.

Naligiinneq, toqqissisimaneq ataatsmoornerlu siuariartitsisarpoq, taamaattumik ukiuni tulliuttuni sisamani suleqatigiilluarnissatsinnut qilanaarpunga. Nunarput inuila pillugit.

Qujanaq